

全華叢書

8

九靈山房集卷二十五

元戴良著

郡後學胡鳳丹月樵校梓

樂府

短歌行五解

悠悠逝波歲月幾何君子有酒式宴且歌

解一

人無百年

五十已過來途漸少去途苦多

解二

日不重旦春不兩和

今我不樂顏能再酤

解三

寒蟬在柳蟋蟀鳴莎情以秋悲

髮以憂皤

解四

旨酒既傾短歌是哦聊樂一時孰知其他

解五



門有車馬客

門有車馬客，駕言故鄉至。問訊辭未終，相顧輒揮涕。歎我久不歸，流落江海裔。空懷錦繡腸，何有王霸器。童僕失舊歡，妻子生新喟。昔如鷹脫鞵，今作鵠垂翅。仍聞邦族間，近亦多凋弊。市朝旣遷易，衣冠恒殄瘁。松柏匝廣阡，蒿萊蕪故第。天運無終窮，人事有崇替。彼道苟如斯，此生安足恃。已矣勿復言，興衰自古然。

巫山高

巫山望欲極，神女出何遲。朝暮自雲雨，君王徒夢思。魂

乘林樹合心著峽猿悲婉變陽臺夜不知今是非

鴻雁生塞北行

鴻雁何從來千里度江湘當春旣北飛涉秋復南翔  
南翔違霜雪北飛逃畏陽豈不念鄉塞所至有炎涼  
客子別家久遙遙征路長朝遊齊魯國暮行吳越鄉  
何思拔秦茅惟憂繫否桑壯心移歲華徂貌委年霜  
蓬落繞本莖蓮飄戀舊房此邦雖樂土故鄉焉可忘

戰城南

將軍西出塞冒頓北臨關欲戰葱河道先奪桑乾鐵

騎已雲集革車仍電奔綏邊吾豈敢聊報一餐恩

雜怨二首

並翼猶有義比肩猶有情誰知歌扇妾虛負合歡名  
君淚如朝露妾淚如春瀾朝露應時晞春瀾何日乾

三婦艷辭二首

大婦蕩湖船中婦歌采蓮小婦獨嬌態含羞辭未宣牽  
篷掩花面何處不堪憐

大婦剪羅衣中婦綴珠帷小婦獨無事月下理蛾眉花  
落滿庭曲何從覓履綦



飲馬長城窟行

將軍西擊胡道過長城窟飲馬馬不前爲有征人骨征  
人之骨朽且寒沈寃浸恨知幾年當時亦爲擊胡死流  
落孤魂此水邊秦皇秦皇好征討誰識窮兵是無道爲  
君無道天實亡不備中朝備北方一朝禍至蕭牆起回  
首長城空萬里

雉子班

天地茫茫遂物情雉子班兮在林垆心懷耿介飛且鳴  
扇綺翼振錦膺文章盡稱麗意氣自多驚甯判帶箭死

榛莽不肯爲裘奉聖明  
韓信烹漢鼎仲由醢衛庭  
智勇難並立賢愚每相傾  
宜哉避世士往同雉子逃其形

### 城上烏

城上烏脩脩尾畢畢  
通體寒誰識得聲短強相呼爲憶  
結巢巖穴日一歲還生八九雛  
羽成翮備各飛去仍留阿母向城隅  
向城隅何所止居烏將北遊雛莫與俱  
我欲遠銜汝力弱而口瘡方欲舍之行  
又恐秦家桂樹枯雛兮雛兮慎所如  
毋毀汝巢毋闕汝軀

### 有所思

我思美人乃在瀛海之東隅去路何迢迢青綺綠浦相  
縈紆常時起向高樓望美人不見空愁予空愁予路難  
越夢裏縱窺巫峽雲覺來詎覩洞房月記得洞房年少  
時繡戶文窗羅綺帷鸚鵡盃中酌芳醕鴛鴦褥上聽歌  
辭荏苒歲云暮佳期不得顧鏡臺朝揜學月眉花堦夜  
黯如雲步美人兮美人年年此地暗思君願君莫作秋  
來草一廻見之一廻老

艾如張

翠爲衿錦爲衣朝朝暮暮澤水飛澤中青草深且茂莫



聽爾媒登壘，碓壘頭西接桃李場。蓬藿艾盡有羅張，羅雖可避機，莫測爾誤觸之，恐身傷。請看舊日張羅處，祥鳳冥鴻不肯顧。

朱鷺

朱鷺何從止，去啄金堤飲玉水。朝隨赤鴈暮碧雞，蕩漾驚波不得棲。有時挾子上林去，網絲紛紛復難避。不如歛翅江海濱，遠卻幽并遊俠兒。

白頭吟

莫把白頭吟來調綠綺，琴蜀客當年聘私室。兩情總向

琴中得誰信黃金買賦時已是青娥辭寵日兔絲春來  
託女蘿雪霜未至尙纏柯若箇人心如草木不到白頭  
妾遭逐妾有嫁時綠玉簪時時插髻悅君心一朝墮地  
雙股折恰似君心中道絕我簪縱折猶共藏君心一絕  
去他鄉

西門行

出西門望崦嵫莫停乾軸駐坤維歎人生感盛衰壽命  
百年焉可期燕東逝鴈南歸今日不樂待何時鑒徂貌  
撫頽機起招親識飲華卮歌唱曲揮舞衣放情舒意解

憂悲

題羅氏五老圖樂府三解

五石隕東海鍾秀五老人五石隕東海鍾秀五老人  
厖眉鶴髮槁項癯身韜光養晦葆精毓神年旣孔高福亦  
隨臻歌以言之鍾秀五老人

家居五磊山人與山俱壽家居五磊山人與山俱壽伯  
也居前叔兮在後上孤楚老下鄙燕竇如星之列如嶽  
之秀歌以言之人與山俱壽

睢陽圖五老乃萃羅氏門睢陽圖五老乃萃羅氏門昔



聯鄉梓今則同根昔在朋僚今作弟  
昆匪善曷致匪義  
奚敦歌以言之乃萃羅氏門

日重光行

日重光天命良悠悠日重光陰廻陽薄春復秋日重光  
人生百年苦易滿日重光黑髮幾時還白頭日重光花  
謝必再開日重光人不再少老卽休日重光堪歎富貴  
利達日重光一時變滅如浮漚日重光何不學彼神仙  
日重光遙遙物外身長留

月重輪行

天運茫茫月重輪盛時難久長月重輪窮通榮辱一來  
一去無常月重輪人生在世忽焉遷變如流光月重輪  
善哉古昔人功立名揚身沒之後千載何煌煌愚觀一  
時聖視無疆我觀我生堪歎傷堪歎傷

五言古詩

感懷十九首

黃虞去我遠大道邈難追悠悠觀世運終古歎興衰王  
風哀以思周室日陵遲二伯方迭起七雄更相持兼并  
逮狂秦干戈益紛披復聞晉虜亂五胡乘禍機殺伐代

相尋昏虐無休期羣生困塗炭萬象翳氛霏豈無憂世  
者咄嗟吾道非楚狂隱歌鳳商山淪采芝去去君勿疑  
古今同一時

杪歲屬搖落青蒲忽青萌達未幾日大火已南明天  
運一如是廢興安得停商郊遷夏鼎殷士裸周京冀方  
旣已沒毫社亦已平務光真達道徹屣薄時榮

大運淪三代高人尙誰窺昭昭羊裘子乃悟白雲期身  
託富春耕心習桐江絲高視萬乘主清風振四垂世間  
驕豪輩驅逼正嶷嶷何當攀逸駕山顛與水湄



寵極辱會至勢利真禍羅君看道旁木幾曾成斧柯世  
中繁華子追恨每苦多芬芳有徂謝平地生波風陸機  
去華亭蘇子狹三河平生已謂畢末路其如何

高居觀羣動役役將何爲巧智遞傾奪利欲爭刀錐古  
昔有遺言財多怨之歸天桃沐春雨灼灼能幾時累愚  
不知戒永爲達士嗤

吾觀陰陽化浩浩靡有停圓光甫東照靈曜已西傾以  
之歎斯世誰能獨久生金仙談寂滅老聃示窈冥亦有  
羨門子道與元化并不死復不老翩然凌太清顧憐蚩

蜚輩誑譎誤丹經

秋風何蕭瑟一夜下庭綠登高望宇宙悄悄傷心曲人  
生百年內四序相迫促衰顏與頹運去去不再復今晨  
與君會明旦成往躅夸父走虞淵前途乃爾速世人不  
自悟朝暮營所欲冰炭滿襟抱殊無一朝足奄忽乘物  
化身名同草木

時秋救邊急喧呼聞點兵荒城接沙漠羣馬盡嘶鳴荷  
戟者誰子贏糧將遠征借問何所之天驕窺漢城西奔  
丁零塞北走單于亭窮冬冰雪交殊方不可行骨肉兩

決絕悲極哭無聲怯卒當勁虜投魚鯁長鯨已分沙場  
死暴骨無完形驅車舍之去不忍聽此聲聖人御寓內  
早使太階平

伐木音久廢交友竟吾欺利害紛啖食迫逐方交馳晨  
起踐零露四顧將安之東路阻山海北走到臨淄臨淄  
古齊國淳風亦早衰惟聞管敬仲嘗受鮑叔知其人今  
已歿鄉里失其依知音苟不存仗劍起旋歸

蛩蛩分糜食有難負以逃一飽不忘報況復成久要子  
大啄母腦亦有東山鴉同氣且相殘將復敦外交

蓬萊與方丈乃在東海湄中有一老翁人說是安期曉  
沐暘谷水夜燔若木枝手中碧玉笙時把紫鸞吹我欲  
訪仙術長跪前致辭飈車歛高舉騰空掩徂輝躋攀莫  
能及望望成朶頤何時駕飛鶴揮手與世辭

元圃有丹木八榦何亭亭光同白玉潤液比碧瑤清不  
知何年代產此至陽精仙經所嘗言服之可干齡吾將  
具舟楫涉海掇其英

良辰豈長遇陰晦在須臾今日弗爲樂明旦恐不如都  
門多佳麗清嘽當座隅促席道平素況有高士俱列俎



過三鼎傾酒盡百壺揮金娛心意慷慨不留儲達人每  
酒蕩俗士恒自拘白頭懷軼軻撫已一長吁

在世忽如寄胡乃勞其生濁酒報初熟頽然醉前榮日  
莫彩雲歛天宇湛虛明羣動各已息一鳥忽嚶鳴感之  
欲長歎酒至還復傾陶公歿已久誰能喻吾情

索居將永矣浩然懷故都故都何處所限此江湖與時  
時起望之風波緬前途獨見雙飛燕連翩還我廬我廬  
有叢菊近亦開幾株恐從分別來靈根日就蕪請爲語  
比鄰蚤把惡草除惡草除已盡歎息復何如

落葉響空山，羈鳥號莫林。此時單居婦，哀怨起瑤琴。清  
商逐風轉，三歎有餘音。分明曲中意，感此離恨深。空牀  
亦易守，時寒難獨禁。涼飈一夕起，達曙懷重衾。君固執  
高節，詎知傷妾心。

家藏兩寶劍，已合雌與雄。潛鋒在金匣，謂當長相從。何  
言風雨夕，化作雙蛟龍。一遊吳水西，一落豐城東。相去  
邈千里，時時氣上衝。神物終不隔，歲晏會當逢。

遊魚返重淵，飛鳥歸莫山。行子別鄉國，旣久何當還。日  
落長風起，稜稜氣遂寒。居人息深帷，浮客未遑餐。憂虞

銷素質風霜凋夙顏惟餘一寸心歲莫保貞堅  
涉波采芳馨見此綠荷好拳莖折其絲芳情共纏繞良  
人久離居欲寄隔遠道遠道不可卽孽物坐空老

遊香山

薄遊東海日已羨香山名飄泊遇知己招邀諧夙情漾  
舟孤浦發抱策古原行迤邐遵淨域紆徐歛禪屨披雲  
禮梵像漱玉事尊經洞尋佛迹古井瞰錫泉清前峰象  
騰勢後崖獅化形忍草林際碧覺花川上明塵中累可  
絕物外理宜冥願言持有漏卽此問無生

遊東湖

漾舟疑港斷進帆喜湖廣境麗趣非一路迷心已往雲  
峰互稠沓烟波紛滉瀆梵宇浮鏡入琳宮躡屏上浪起  
孤嶼沉水落眾山長隱隱草畔堤悠悠蘆際榜幽懷自  
此多客情復誰獎身固脫虞穿心猶寄塵網安得超世  
姿來縱山泉賞

遊大慈山

水行境謂盡陸出路旋通乃卽蒼松逕步入青蓮宮連  
嶂旣嘗萃密林亦葱蘢地涉清淨界身遊紫翠重臨流



玩廣沼企石眺奇峰寒鏡湛秋夕碧玉割晴空蘭若與  
年峻象筵緣教崇謁祠慨鄉相尋僧叩禪宗契理已無  
像觀念豈有窮願絕區中緣永依塵外蹤嗒然遺身世  
年齊天地終

遊天童山

避囂去城市遣悶在川岑遂申獨往意行此無盡林松  
篁儼映鬱蒼翠邈深沉九隴山已見三生石可尋列障  
圍招提傑閣俯嶇嶇池光亂塔影澗流傳磬音龍化井  
已竭虎去泉徒深周顧信靈迹遲留多賞心念未委塵

妄事可息煩襟卽理苟已協何用戀華簪

遊育王山

栩栩招提遊冥冥山海觀玉几峰影橫金沙水流漫鷺  
嶺鷺皦日鴈塔峙清漢遠睇朱甍起近覩丹宮煥金輪  
事已往舍利光猶爛亦有巨人迹不隨塵劫換陟降境  
愈繁應接日旋晏耆闍固追衍泉石寧盡翫浮生諒多  
途又動歸與歎

贈別汪定海二首

兄弟本同氣恒如行路人誰知風塵交翻勝骨肉親異

鄉方縵綵中路遽乖分素琴彈別鵠有耳不忍聞  
前舟已云發後舟更誰待春事動江臯客愁滿山海別  
晷只須臾會期知何在亦旣違素心安得顏不改  
故人忽已別兀兀吾何適暮投甬東路不見往來迹古  
寺靜脩廊空齋冷虛壁獨有階上苔猶如舊時碧

題盤隱軒

曲蹊繚深碧廻澗澄遙清誰知慈水上亦有盤谷名慕  
巢屏世喧等李薄時榮仿像中原路迢遰太行行軒居  
儼映蔚薨棟欵崢嶸暑檻停綠樹夕堦飄素英一翁臨

暮齒二允當弱齡秣醕報初熟瓢竚自同傾厭厭檢素  
展寂寂塵事冥窺鳥感歸翼觀魚悟潛形旣已愜時物  
亦復諧友生琴書許交錯辭翰俾縱橫老我記曾遊遙  
途阻重征溪山寄幽夢林堂留恨情可隨東浦月流光  
到君庭

贈星士

少小事游說南越仍北燕謀身難委數作事詎由天偶  
遇青囊術從究白衣年窮通三算裏出處九宮前乃知  
蟣蝨臣亦應箕斗纏諄諄造命訓粲粲非相篇其言固



多辨乃不識子賢

遊慈湖

青年尙奇偉末暮竟迤邐出遊訪陳迹歷覽愧前賢  
湖光紛蕩漾山色互澄鮮人以淑氣鍾境由名德傳我來  
值初夏物意盈化先渚蒲葦曩滓雨荷媚新妍披榛度  
南極躡苔趨北原川岳無隱形祠宇有餘閒俛視淵底  
魚仰觀天上鳶撫化心已愜卽物理自全舞雩記曾詠  
濠梁憶莊言不見祠下人感激爲誰歎

遊定水

常公開化地源師講經處人物有古今山川無新故臺  
馳旣西峙鳴鶴亦東翥清泉冽廣沼蒼松夾永路入寺  
結青蓮愛方薰玉樹三足想後因四禪感前悟此生眞  
幻化學道奈遲暮感歎顧昔心悵焉起遐慕

蒲菴

瞻彼水中蒲采之將何以母老不下堂兒行在萬里空  
門隆孝思除是睦州師

天香室

咄此月中桂移根向金沙清香滿幽室天都亦未加憶

在梵王家曾看優鉢華

中秋翫月

前時避世亂遑遑齊魯間豈無中秋月掩淚不忍看南  
來如昨日秋空月又圓時運尙環周客子未歸旋身羈  
逆旅舍迹隱滄海壖不惜歲年晚所悲窮路寒知心有  
好友置酒當前軒邀月與之俱怡我戚戚顏我顏固可  
怡我心亦可歡獨奈秋月輝鮮明非往年

次韻答毛彞仲提學

毛君於爲詩思擅語復老氣吞雲夢人力蹴崑崙倒杜

壇時踔躍韓窟極探討晉宋失風騷齊梁讓葩藻謂當  
擇珉玉乃忽忘醜好繽紛贈瑰詞錯落見龜寶泠泠伐  
木音疊疊太元草光怪瞻陋室巧麗怛愚島朝諷已推  
襟暮讀仍遠抱戒亡擬刻琰懼泄思熟豪才高每遭忌  
命險眞再造昔也赴湘流今茲蹈海潦人固有屈伸世  
豈無白阜羽翼低易摧聲名積難掃指注者流俗鑒觀  
則穹昊誰其絃我歌爲君薦神保

客中寫懷六首

寄婦



結髮爲夫婦所願在偕老誰知頭白來喪亂不相保我  
昔從一官攜汝登遠道芙蓉蕩風波寧有幾時好猶記  
東門日別歸芳草草再拜前致辭幽咽不能道手提小  
兒女慟哭向秋昊詎識是生離積骨白浩浩汝歸終可  
安我去事轉艱家旣異疇昔去住亦俱難況乃畢婚嫁  
百費萃茲年內方撫羣小外復給上官日夜聲嗷嗷孰  
與分憂煎夫妻不同苦不如寡與鰥汝幸毋我尤我行  
偶迺遭人道無終乖天運久亦還豈復長流蕩庶往共  
飢寒

憶子

綿綿我瓜瓞引蔓空爾長有子將得力棄之往他鄉他  
鄉與故里兩地永相望獨有中天月遠照雙松堂雙松  
我所植念之猶不忘況復兒與女不見今六霜大兒踰  
弱冠有姊同已長想當望我時齊行松樹傍見樹不見  
父嗚咽淚成行小女年尙稚與弟走踉蹌相呼戲樹下  
何處褰父裳反哺有慈鳥跪乳有羔羊人事獨睽乖俛  
仰我心傷

念姊

淮陰古壯士猶感漂母情而況我同氣由來恩愛并一朝  
遭世患舍之以徂征惟當欲去時涕泗下交傾荏苒  
歲年莫兩鬢各星星每念焚鬚事怛焉心內驚老去成  
飄蕩所志在偷生顧枉申申詈詈我久遠行我欲喻中  
懷獨有絃歌聲絃歌清且悲一鼓淚已零再鼓三歎息  
四座不忍聽可隨晨風去長跪陳素情

思弟

將老計轉拙故里不得安兄弟各東西何用保餘年前  
時吳山上與汝酌東軒已知是久別盃行淚如泉征夫

懷往路居士戀故山音容從此隔望望兩心酸去冬得  
汝書知汝病未痊道遠不能顧掩書一長歎邈來頻夢  
汝喜汝無病顏生死方未知誰能詰其端自嗟農家子  
止合老田園才疏學更誤遂爲塵網纏晚節益零落何  
日得歸旋仰視雲邊雁羣飛必相連徘徊失所從愴然  
摧心肝

示姪

老來逃世難心力豈能及賴有平生親得免諸患入時  
當萬里行所向輒險澁山多虎豹虞水有風浪急自非



吾骨肉誰能去鄉邑已遂伯陽遁尙灑楊朱泣何邦爲  
樂土仍期共棲集囊中黃金盡資用將何給豈惜終憔悴  
在困難獨立憮然念猶子詠言著斯什

懷友

貴盛多士趨衰賤親交棄投老涉險艱誰人敦氣義往  
歲客吳越保身無善計風雨交橫來倉皇不知避陰雲  
竟日起龍蛇沸相噬咫尺且莫期千里詎能致徘徊畏  
途上所向色憔悴不有高世士緩急吾何恃時時想舊  
情涕淚滿衣袂恨無縮地法一見陳往事絕塞悲鴻鵠

秋原老騏驎同心不在眼蹉跎愧前志

賤生述懷呈在座諸公

靡靡五月中忽忽值初度載觀此身世安得不悲慕我  
自弱冠來早已失恃怙莫攀墳上柏幾歷歲華莫一官  
冀榮親乃與禍機遇不得顧妻孥誰能問邱墓三歲客  
東海月夜鵲飛樹餘年尙幾何未知止息處幸有同心  
人相期此漂寓投身豈無所揆意難卽去今日定何日  
兩鬢已垂素猶子請揮觴邀賓強笑語詎識忘憂物翻  
是傷心具我親長已矣我兒今孰撫一女年亦笄誰與

卷三  
藏板  
畢婚娶固賴慈母在艱難營近務終愧爲人父有子不  
能顧盛衰豈人爲賢愚亦天數苟不替宗祧何憂復何  
懼我躬且不閤尙暇身後慮

近觀以大鶴年和韻諸詩因借韻呈二君子併述

已志云三首

輝輝凌霜葉歲暮靄顏色宜哉固窮士秉心如鐵石志  
乖尙欣豫道勝豈愁寂冠服自今茲操行眞古昔挾冊  
時政寒照簷光已夕孫生讓苦心袁安同至德長風掃  
凝塵荒苔翳行迹知音諒已稀守賤何所惜棲棲東鄰

予亦脫卞公幘

內懷松桂性外抱霜雪色心已委窮通家豈問儋石義  
廩餉飢劬僧榻借禪寂晤歌度芳晝清嘯終遙昔避世  
多歲年臥病幾晨夕使者求顏闔邦伯候龐德塵中旣  
息交物外姑屏迹但期高士賞豈顧癡人惜緼袍苟不  
恥無言受衣幘

傷禽有驚韻達士無怨色彼道政多岐我心非轉石遙  
途寄孤蹇衡茅守虛寂新喜絕方來故歡慚宿昔靡靡  
念平生厭厭閱朝夕青黃信爲災支離乃其德老聃尙



蓬累宣尼猶削迹蹈道苟勿愆沒身亦何惜且共酣中  
 人一笑穿吾幘

九靈山房集卷第二十五 終

九靈山房集卷二十六

元戴良著

郡後學胡鳳丹月樵校梓

五言古詩

貢尚書新祠六詠

高風臺

重城控閩徼維西有崇臺江練望中滅峰蓮行處開海  
引頽波去山約高風來境在人已亡目極令心哀  
鳴鳳亭

言登三山道遙望鳴鳳亭勢高翔北極境勝壓南溟已

協吹笙趣空多銜詔情嘗聞故老語貢公此遺榮

西泠泉

茲泉誰所發地脉一朝通昔彰思治意今寓澤物功停  
車已酌廉橫經仍養蒙伊人竟何在流恨有遺蹤

思玩軒

粵部蒞星使海邦分地官清聲播遐壤遺愛託茲山履  
綦滅遊迹祠宇有餘閒椒漿阻臨奠延首一長歎

樂善齋

若人抱深識有善必見知重士慕公旦好賢比緇衣匹

儔慕景響儂從隘門基高齋今寂寞歲晏吾何依

白雲窩

行窩僅容膝胡乃以雲名呂觀旣云披陶思亦嘗停仰  
簷歌郁郁觀室詠英英豈爲其人沒悠然見光靈

庸道提學訪予定川寓舍旣而雲莊提學亦來會  
次日庸道別去雲莊攜酒至明波約予同餞予  
以病不果往雲莊有詩遂次其韻五首

越人薄交義孰主雞壇盟遺佩憶澧浦合劍慕延平懷  
故非任運歡新真達生振衣者誰氏理棹此趨程亭午



造東館薄晚饌前榮相求配伐木吐訊感分荆但聞悲  
促柱不覩笑絕纓萬事良已矣且共咀芝英

青春豈長遇白日不再中得失笑魯寶存亡悲楚弓宦  
遊能幾日干戈已一終咄茲年歲邁何人心志同終然  
蒲葦岸偶映金碧叢設筵畫堂北睇雲天漢東舉杯問  
明月脫巾御冷風倡酬歡徹夜歌嘯聲摩空身世付蟻  
蠓榮願等苓通放浪至天旭庭燭尙搖紅

句章古名郡遊子號鱗襲惟今有兩士絕世而夔立儒  
宮鼓篋遊軍門排闥入開囊何瓠翰持橐盡詩什避時

車已捨登途屢仍輯丹心豈徒秉苦節諒難及亦有牆  
東客時同話憂悒

居人懽未畢行客舟已理晤對豈無人眷戀在之子灑  
灑清風生英英白雲起喜消飛珮初愁纏分袂始君情  
江上波我心井中水去住不獲偕感傷何時已

負痾乖飲餞神往形獨留已悲陰漠漠復感風颼颼遊  
魚樂同逝鳴鳥悅相酬心交忽已遠志合更誰求酒甕  
漉初熟蔬畦摘新柔座有古毛義寺逢今貫休以之宴  
河曲相從賦刀頭佳會顧愆期愁鬢已先秋誰能久寂

冥指景逐行舟

九月八日閒居無事因誦淵明秋菊滿園持醪靡  
由之語慨歎久之忽雲莊提學攜酒見過遂歡  
然共醉

運行儵飄忽逝水縱虛舟朱夏始徂暑素節已深秋天  
高涼風冽露凝寒氣浮歸燕別春巢來鴻鳴曉樓菊可  
壽衰質酒能消隱憂顧茲孤蹇迹孰慰年歲流知心有  
好友攜酒訪窮愁摘芳相映媚引滿同獻州一酌情已  
遠重觴興彌幽插花我放曠持爵子夷猶參汝陽飲

邈邈龍山遊吾今思已高何用登崇邱

芳橋宴集分韻得兩字

昔思整去裝今願憩徂兩顧茲世路艱愈歎日車往達  
人豁繁憂美景恣歡賞座有朋簪合庭多賓珮響摘萸  
新貯囊采菊細擎掌時物已內酬客心仍外獎信美終  
異鄉雖樂非故黨何時息風波一葦泛河廣

題蘭芳齋

靄靄高齋暮浮遊此空林不遣蘭爲友孰可與同心綠  
豔媿秋色紫葩搖夕陰芳意徒自負幽期竟誰尋以之



念身世三歎援孤琴猗猗不成操豈爲無知音

東山宴集分韻得月字

良儔會遙途芳醕宴華月繁思靄元夜浩歌振清樾暫  
合樂易窮念離憂難歇綿綿道路艱冉冉歲月忽後茲  
胥會時知添幾霜髮

遊龍山

昔聞龍石名今覓龍山路泛江循近洲卽陸入遙樹離  
離列綵巖泫泫濯甘露歛見雨微峰高出雲飛處好山  
殊未歷遊子已多趣尋幽雖欲行愛境不能去庶憑物

外蹤稍息塵中慮，佛廬旣崇曠雲閣。復高據登臨，當雨  
餘眺望，屬秋暮意同疏木寒。興逐驚鳥翥蒼蒼，暝色起  
杳杳。晚鐘度耽翫樂地幽趨，事嫌迹遽爲謝林下人行。  
當重遊寓

遊清泉寺

路繞蒼松迴寺俯，清泉幽況復得佳友來遊。當杪秋情  
隨水聲遠興挾山光浮，兩礪涉遊足雙峰睇吟眸。陸尋  
虞監宅林訪袁家邱，徘徊念疇昔感歎罷冥搜。古今如  
大夢身世一浮漚，不悟無生樂終纏有漏。憂悟言資道

侶冥理契緇流咄嗟已成累竟動故園愁

永樂寺觀先師柳公三大篆及諸石刻泫然賦此  
舍舟遵微行振衣遊淨域誰知登眺初已動存歿憶大  
篆揭巍堂古句刻貞石辭翰固留今身世悉成昔筠綠  
雨新霽山寒窗易夕方懷露電悲何有林泉適出覩堦  
上苔一是舊行跡我心如礪水欲流翻震激

自定水回舟漏幾溺

清遊夙所嗜投老興未已一朝得良儔投袂爲之起龍  
山屐旣躡藍水舟亦艤復訪清泉境三宿石林趾葉氏

好弟兄堅留酣酒醴屢辭不聽去維繫久乃弛遂乘一  
敗艇夜遡潮江水中流遭墊溺指顧有生死既類投湘  
屈復近捉月李雲莊得神助躍出洪波裏長呼施援手  
臂與老猿似唐生脫靴鞵投棄如敝屣亂江上崩岸赤  
脚不顧禮空津稍駢集隙地僅盈咫前江後畎澮擬步  
輒傾圯旣爲屈蠖蹲復作拳鷺峙頃之雲益黑四顧無  
託止復賴雲莊仙指揮命舟子竟將補天術塞卻漏船  
底仍逆衝波急直榜慈溪涘已瞻舊館近舍舟同步履  
叩門訴館人慰藉雜悲喜咄茲六尺軀忽忽當暮齒危



遂冒險艱到今知有幾君子處斯世真與此舟比傾覆  
乃其宜得濟誠幸爾因歌戒溺篇持用謝知己

書畫舫宴集分韻得澹字

平生學已誤未暮道逾貶久酣世味醲益羨朋交澹座  
既接簪纓享復與昌歎偶會情卽親未識氣已感驚鱗  
樂連藻倦翮媚叢茨既忝末席歡不飲吾何敢

以大先生遺冬菊

時冬卉木變高齋淒以清不有籬下菊芳意竟何成夕  
餐金爛爛曉掇星熒熒已足娛晚歲況可制頽齡君子

篤惠愛分贈到空庭盈盈一水隔託此結幽盟色以喻  
中道香以表孤貞一花知微賤所貴故人情

題葉守常愛竹軒

詩嘗詠淇澳律亦鳴嶰谷逖聽豈不懷希聲竟誰續有  
美幽隱人早厭喧囂俗作室臨地偏開軒愛筠綠雨葉  
媚晨觀烟梢延晚矚攀枝想龍化摘實遲鸞宿賢思晉  
士七逸慕唐人六清遊茂林下沈飲廻溪曲喧飈蕩昏  
旦層輝麗川陸至樂非外求深情自爲足謬循遊士蹤  
偶覩高人躅可隨竹畔風瀟灑歸君屋

汪明府以畫竹遺唐伯度求予題

擢榦纔數尺幽姿已猗猗憶在縣齋日偏栽此竹多寫  
直方有託持贈意如何

題清暉樓

緬懷石壁遊載歌康樂詩築室抗華嶠臨流對清暉坐  
中鳳湖見窗際龍岫微近矚層波渙遠睇連岡馳巉巖  
曙雲裏漱漱夕陽時氣候非一狀遊觀具在斯之子謝  
維繫息景偃郊圻峰影墮書帙波光搖硯池陋彼金門  
步敦此玉山期而我去鄉縣空林閉衡闈式窺登樓作

益動歸田思

題鳳湖梧竹居

鳳去臺久空世已非姬周誰知東海地尙想西康州爲  
重王者興庶希靈羽留種竹實下垂植梧枝相樛風雲  
感期會牛斗懷匹儔於德苟無取此計豈良謀鳳瑞固  
難僉人瑞當易求若士產眾雛結巢居上頭朝琢玉山  
禾夕飲醴泉流坐看綵翮就起作赤霄遊小將啟家慶  
大可昭皇猷碧梧與翠竹致此益有由

訪烏繼善不值明日以詩見寄遂次韻答之三首



達士不羈世投身向寬閒出處一虛閣翠樾帶澄瀾高  
懷抗塵表逸思窮元間亦念泣岐客悠悠歡會難  
青雲志已乖白頭元懶草家貧無宿儲逐食在遠道風  
霜減容鬢憂虞損襟抱不有同心人誰其慰枯槁  
佳期詎可失況乃桑榆時居人忽不見行子終何之暮  
色已凝嶼晴光始泛池默默就歸路益歎瓊樹枝

甬東精舍訪安仲善書記

繚繞西城曲逶迤一徑通院深不知處日暮但聞鐘蔓  
草泛光迴潛筠結影重噩公舊弟子亦住此林中朝夕

孰與晤二難言笑同弟兄世多有誰共得禪宗稍約遊  
山侶來尋汲澗蹤境幽慮自淡詎能承道風

王止善自鳴鶴來訪賦此以別

貴賤異今迹賓友易前心況乃干戈際復此歲年侵門  
巷久已寂劍佩非所臨洞識棄衰盛高誼畧浮沉顧枉  
丹梯步見就碧川潯羈足戀歸影迷羽怯離音明發忽  
言邁幽懷浩難禁神交不在舊歡會當自今倘遂卜鄰  
願遲子湖山岑

龜毛廬

倦遊去朝市委懷在田園既悟執戟疲益知荷篠賢夙  
晨飯牛出夕曛負耒還春作固云力秋歛未盈廛求贏  
豈其願拙業乃所安不見龜上毛成羶亦良難

草心菴

息念謝囂俗滅迹偃中林川岑寓耳目邱壟曠形音虛  
堂帷幔撤幽途狐兔侵戲斑既成昔刻養空遺今探囊  
悲識遠閉坎憶情深雖後三春景寧忘寸草心

題靜勝軒

端居觀羣動貴賤各有營刀錐競微利風塵逐浮榮朝

暮走囂市夢想戀神京  
冰炭俱在懷是非亦交嬰  
不爲物外纏獨有靜者情  
松門盡日掩山鳥繞舍鳴  
捲幔風花落步庭春草生  
地遠慮自澹身閒心乃清  
逍遙足爲樂一笑萬事輕

題嚴氏蒼雲軒

嚴乃子陵之後故取雲山蒼蒼語名軒

茂植有鬱條澄源無濁流  
若人嗣芳允撫境懷令猷  
蒼蒼亂山出翳翳族雲浮  
何言姚江住不似嚴灘遊  
雨耕循近墅烟釣薄遙洲  
晨出庭戶靜夕息軒窗幽  
第嫌古今迹永間東西州  
悽悽百世心眷眷千里眸  
存家子悵



惆浪迹我夷猶忽觀述祖作祇重越鄉憂

題魏氏福源精舍

在上虞夏蓋湖

虞耕表鄉縣夏載紀山川前聖事多往後哲慶方延偉  
茲鄭國裔彌曠李唐年運移澤謂竭家久禮益傳直道  
遡前訓孝思光往篇合宗懋民德通急拯時邇幼壯尙  
沉滓未暮豈纏牽山遊玩松月湖泛弄苔泉地隔人烟  
迴天浮雲景鮮生應寄別業死竟託幽埏名無汗簡錄  
行有金石鐫每覩穹碑煥兼懷嗣子賢欲知百世後當  
求千載前本固榮斯盛源深福乃綿羨魚須結網不稼

詎盈塵寫誠勵朋好世美非徒然

對春雪寄梧竹翁二首

當時寒已收今茲陰尙結惜此豔陽天盡付蕭騷雪穿  
花適自亂雜雨詎成潔獨有灞橋人詩思益清絕  
積雨已兩月飛雪亦二旬但釀谷中寒詎覩原上春庭  
無鳥聲樂門有虎迹新君子篤惠愛應念臥飢人

十一月十日紀宗正夏君衡約遊東湖舟行未數  
里雨忽大作乘夜至湖下宿高氏墓廬頽垣敗  
屋而四顧蕭然君衡呼酒劇飲談至夜分霑醉

就睡亦佳甚獨惜孔昭葉君既行而復止不得  
與此清會次早簷溜不絕遂泛舟而回舟中作  
此以示同遊諸公且寄孔昭

遽覩芳年謝坐虧清景遊幸茲舟楫具肯爲晦冥留空  
江已遄濟凝雲猶未收浦寒雨隨作篷漏霰仍投澄湖  
限遙境溢潦翻近疇急時暗促榜失路夜迷洲老篙泊  
洄曲童子棲浪頭僅尋空館息彌動羈客愁鳥聲入簷  
急虎迹當門稠人咤久失主鼠欣新得儔障牖挂衣袂  
燭竈熱薪爇肴核稍羅列醴醪聊獻酬僕御競歡譁賓

朋恣吟謳外患悠悠逝中情疊疊瘳已諧安集意游爲  
棲宿謀掃地藉橐結解包出衾裯棟溜訝潛滴礎潤驚  
暗流偃坐類屈蠖駢臥劇拘囚悶懷仍抑噫苦語重呶  
嚶默誓屏遊屐嘉願赴歸舟陰晴分預卜行樂且復休  
第恨同袍友近在東家邱窮年訂期約此夜闕綢繆鬱  
鬱蓄良思依依清猷茲會已云失何時復相求

舟次高錢遲孔昭不至詩以速之

屢約湖曲遊良辰輒蹉跎及今風雨夕一葦凌寒波遙  
遙度墟里靡靡轉坡陀暫息泉上樓倚欄頻嘯歌此時



知心友愆期在山阿儔侶徯之久不至復何如

湖上對雨有懷天淵老禪

空濛暗遙甸淅瀝響高樹乍縈林表來復灑重湖去瀟  
瀟孤興發望望寒川莫念與道人期雲深不知處

留別白沙諸友三首

頻年接歌笑誰忍隔音形一爲寒餒迫頓忘別離情春  
帆已駕浦晨鼓亦催程可得重相過同聽夜潮聲  
別筵春寂寂分渚草離離徘徊折芳杜悵望失佳期潮  
水有虧日客情無減時已矣心中事終遣與誰知

雨暗長江夕鐘動寒城曙居人息深閤遊子行多露冥冥見烟花曖曖想雲樹不道絕遊從晨昏自難度

寄秋崖講師二首

四窗舊弟子胡乃住茲山緣思竹一擊遂分雲半間宗門資荷負衲子賴陶甄毋徒效前懿飢餐而困眠涼風振乳泉落日照白鶴清境曠蕭條高僧屬棲泊談經瓜爲香說法花亦落何當棄塵勞來問無生樂

承天淵天敘二禪師下顧適出不及一會而去詩

以謝之

相聞非一日相會在何年行道偶來過盡興復言旋豈  
伊塵外迹合屏區中緣去就旣殊踰動靜詎皆禪身名  
端可遣物累諒終纏悠悠仰高韻默默阻中悵

七言古詩

揖月樓歌

爲陳節判賦

故人昔官東海陲舉杯邀月月不知故人今住北江滢  
開樓揖月月乃至彼月於人無愛憎倏而墜兮忽而昇  
一昇一墜催人老人非靈仙安得與之久相好君不見  
漢家有樓號干雲又不見晉代有樓名伺星兩樓只今

誰作主惟有明月會照當時人當時人已矣明月獨如  
故古往今來共如此仰看月光能幾度念此長歌雙淚  
流人生似寄君識不欲遺身世放情意除是登君揖月  
之飛樓月兮月兮於我亦何有昨照黑頭今白首黑頭  
白首可奈何且盡今宵一杯酒酒酣爲問誰可揖世間  
只有此月心莫逆酈生空揖隆準公汲老徒揖田相國  
達固無足取窮亦不足慕但願仙人降靈訣使我長與  
是月爲賓主吾聞月中仙桂芳下有白兔所搗長生不  
死之藥方因君儻乞得千載不相忘



節婦謠

爲蔡母賦

四明古郡控海隅黑雲壓城風振廬中有一婦貌甚姝  
年未三十卽寡居時時泣血眼欲枯烏啾獸躑助號呼  
旦夕醕奠絕復蘇春秋饋祀悲有餘曷不摧殘殞以軀  
白頭爲有堂上姑姑年旣耄孰與娛孰具晨殽與夕蔬  
晝理蠶桑夜辟纊經營甘旨美且腴奉老仍當撫我雛  
我雛未解膝下趨隻身鞠育竭瘁劬年來能作反哺烏  
空堂夜靜簾影疏燈燭熒熒一寢孤照容已絕翠與珠  
蔽體只穿麻泉孺人生在世不斯須茹苦銜辛何太拘

天地立極聖有謨重茲首教自古初或始乾坤或闢  
民彝所係理豈誣濮上桑間俗易汙栢舟所詠絕代無  
紅顏皓腕滿路衢容不媿德徒區區卓哉此節誰得如  
里巷遺輝日以敷褒題況復有文儒芳名好與金石俱  
我固頽然一丈夫貞節傳中書不書貞節傳中書不書

丹邱先生歌

丹邱先生好仙靈自言手把天地扇雷公電母聽使令  
眾真狎恰通丁寧時秋扇爨氣不清海頭八月神濤傾  
天河咫尺連滄瀛風號雨蝕不暫停雲林老臣卻羶腥

欲召羣仙來降精奈此淋淫時所丁海媧嶽姥溼輜駟  
丹邱先生溘上征坐驅羽駕逆雲行赤龍媵御青鳥迎  
手執芙蓉朝玉京告道祠官竭精誠冀陳脩俎靈爽呈  
天胡奪是兩眼睛有光不照孤羈情頃之颺風翩以輕  
旗旄毳毳擁飛旌口含天語悄無聲爲臣特借三日晴  
扶桑暘谷曉曜頰百神雜沓天路平丹邱先生下太清  
首我瓊弁被玉纓望中恍惚儻若驚訇然向我振威獰  
曷不從之學長生

遊山至葉仲容家飲散因爲醉歌

石林古村鬱深窈幾處樓居挿晴昊主人喜我攜客來  
隔屋頻呼酒家保老來厭受樊籠束十日山行恣幽討  
世間萬事良可知一盃且此開懷抱座中高士毛雲莊  
滿腹詩才鬪葩藻自從偕我林壑遊得句幾回驚絕倒  
沉逢地主亦善詩時出新篇慰枯槁安得思如劉沈輩  
席上同吟醉歌好窗縈月練愛宵遲樓度日車嫌曙早  
眾賓固盡新知樂賤子獨懷心悻悻有家遠在越水東  
數日漂流千里道身心已同風撼木壽命何殊露垂草  
柴桑未返彭澤翁同谷空悲杜陵老好釀澗水添酒盃



盡把閒愁醉中掃

胡仲厚爲予寫陋容詩以謝之

世間誰是丹青手神妙如君不多有一朝來訪逆旅中  
戲捉霜毫貌予醜人生落地無常身紅顏幾日白頭新  
況當萬死干戈際豈有丰神堪寫真胡君胡君眼如電  
席上乍窺如慣見二毛旣已發天機五采亦復開生面  
試拂鸞臺青鏡銅時時鑿我憂世容雙眉交攢兩肩聳  
政與此圖標格同聞說朝家畫麟閣褒公鄂公無處著  
不從當代寫英雄卻向窮途繪老翁老翁醜狀固無比

一種孤高差足喜里巷從今詫許仙慎勿取錢盈二千

海隄行

爲葉敬常州判賦

海潮淼淼海雲黑幾處居民遭墊溺豈無精衛填石心  
海水無情誰敢敵餘姚州佐一文儒射策到來膽氣麤  
手搥大鼓召丁壯誓作長堤備不虞政行令奔喧百里  
畚鍤紛紛集如蟻閩符府檄適復至以賦來從無遠邇  
伐山鑿石倏有聲盡道轟雷動地鳴靈胥聞之尙膽懾  
天吳值此定心驚頃之地脉異疇昔海口分明見山骨  
新隄萬丈與城延怒浪狂波爭不得從茲疆場永莫安

黍稷桑麻應鬱然當知擊壤行歌日絕勝乘濤悔過年  
牧童每指村中路卽是前人沈溺處念功旣許髻齷識  
追恨惟容髑髏語姚江渡頭夜泊舟夜間南岸聽儂謳  
鯤壑鮫洲盡耕作葉公爲政孰與儔古有白公及鄭國  
引渠漑田足民食二渠已廢名尙傳況乃葉公今更賢  
葉公事業海同久海隄可壞葉公之名不可朽

蓬山新樓歌

爲方德盛賦

蓬蓬名山控海壖東望咫尺蓬岳連是中樓居高插天  
雲籠霧鎖巢神仙左蟠龍岫角鬣全右挾鳳坳羽翼翾

澄湖前浸類鑑圓層崖後擁屏障然一峰來朝屹不遷  
班押海國瀦爲淵昂隄伏岸深局鍵驚濤駭浪矧敢前  
彼樓突起正弗偏中窺倒景窟宅專危甍上矗拂斗躔  
雕闌下俯隘幅員綺窗彤檻燦相鮮曲房密閤極邃延  
簷間古樹森戈鋌簷外老石寒飛泉朝嵐夕靄挂復懸  
剛飈浩氣噲欲穿芙蓉城闕特渺綿瀛洲殿閣同精甄  
老仙兩鬢白以元時時陟降跼背肩鸞鞭鶴馭來蹁躑  
東公西母恍後先下觀塵世直螳蜎乃居竈食羅屋櫬  
亦有困食列町疇腥飶腐吁誰賢況復年來逢世癩



滄海盡漲成桑田白骨被野血被川弱者死飢勇死權  
老仙處此私自憐含精養神心益虔仍悲凡質費陶埏  
齷齪甘爲帝所捐伊予沈痼久未痊丹梯百尺愁攀緣  
願從老仙乞數椽含其一字割中邊老仙怖我坐臭羶  
弱水幾迴風引船僅容斗室混民編穢胃何由猛滌湔  
幸哉道眼雙炬燃常時照我不我愆我叅我叩志倘堅  
靈科秘訣終使傳食瓜啖棗度年年

題何監丞畫山水歌

至正以來畫山水祕監何侯擅其美帝御宣文數召見

抽毫幾動天顏喜有時詔許闕內儲名筆班班世所無  
王吳李范已心識餘者山堆皆手摹海內畫工亦無數  
才似何侯豈多遇權門貴戚虛左迎往往高堂起烟霧  
人間一筆不可得門外車徒謾如織葉君使還親集送  
乘興始肯留真迹於時在座總儒冠王鄭歌辭晚更妍  
豈無片語道離恨見侯之畫筆盡捐此畫攜歸在鄉縣  
萬壑千巖眼中見卻憶都門送別時回頭瞥覩西山面  
莫言短幅僅盈咫遠勢固當論萬里既似山河月裏明  
復同衡霍牖中起葉君眼力老愈光愛之不減雲錦章

年來行橐盡拋棄惟將此紙什襲藏何侯遷官定何處  
有客披圖正傾慕北騎南轅倘相值煩君爲我致毫素  
諸侯一寫滄州趣

此畫乃葉君孔昭爲南臺宣使時以公事走京師祕  
書監丞何侯思敬爲寫以贈而畫上所題鄭仲舒益  
孔昭同門友時爲國子博士其王周叔則孔昭居冑  
監時同舍主也時爲翰林檢閱章甫亦宦遊京都與  
孔昭深友愛一時交舊皆文學之士而思敬翰墨尤  
號知名孔昭旣重思敬之所作而又以諸君子之會

合不可驟得攜歸故里請予詩之而併識其始末於  
後觀圖畫之如新口遊從之日遠孔昭安得不慨然  
於斯

題顧氏長江圖

天下幾人畫山水虎頭子孫世莫比何年寫此長江圖  
多少江山歸筆底巴陵三峽天所開遠勢似向岷峨來  
洞庭瀟湘僅毫末楚客湘君安在哉江上一朝風雨急  
老我曾來踏舟立鼓枻旣聞潭畔吟抱琴復聽竹間泣  
別來幾日世已非忽此披圖憶曩時早知避地多處所



肯逐紅塵千里歸林下一夫巾履似亦有舟人與漁子  
能添野老烟波裏便與同生復同死

題出射圖

玉門關南百草腓玉門關北鬪兵稀邊頭無事秋馬肥  
將軍出射沙塵瀰一胡據鞍執大旗翩然前導疾如飛  
一胡引弣如附枝一胡放箭箭不知後有兩胡蹙騎追  
側身拔鏃恐鏃遺玉門關城迴且巍一時士馬何神奇  
我來塞外按邊陲曾揮此馬看君騎爲君取酒盡千卮  
醉裏爭誇戰勝歸到今已是十年期畫家所寫是耶非

卻憶當初親見時

題打毬圖

羣胡擊毬世未見人馬盤盤若風旋場中一點走如飛  
三人躍馬爭先馳兩人翻身驚且歎前視後視迴迴轉  
平沙蹙踏黃入天肯使蒼鷹飛向前身忘激射但狂走  
未知毬落誰人手君不見秦失其鹿人共逐劉項雌雄  
幾翻覆

畫馬圖

吾聞唐家有馬名胡騮寫入尺楮百千秋是何筆力妍

且勁眼底飄飄盡龍性此馬曾經百戰來豐姿逸態何  
雄哉功成未受伏櫪惠愁對青驪若相語隰公愛馬兼  
愛畫市以千金豈高價流傳幾手到南荒夏贇兄弟今  
襲藏年深物化使我傷驍騰無日徒遇伯樂與王良

袁君廷玉以所藏何思敬山水圖求題爲賦長句  
有客訪我城東廬手持何侯山水圖乍向高堂一披覩  
已知筆力天下無老我愛山兼愛畫對此心神忽俱化  
得非鼓柁過瀟湘無乃支藤上嵩華野亭倒影浸江清  
耳邊鬢波濤聲漁子蒼茫泛舟入林翁偃僂渡橋行

因憶良工繹思處元氣淋漓滿毫素豈但胸藏萬邱壑  
西極南溟隨指顧驅山走海何雄哉滿堂空翠揮不開  
丹邱赤城意綿邈蓬萊弱水情沿洄何侯天機深丹青  
世無敵自從揮灑近天顏林下何曾見真迹年來喪亂  
走風塵始爲賢豪下筆親王吳未可誇神逸閻公致譽  
安足珍與客傳觀權未止卻歎何侯今已矣卷圖還客  
休重看世間夢境亦如此



竹重疎林間  
夜衣吹此

愛以多與客  
高體謝木  
止除漢阿  
冠今日  
吳谷  
園設

玄風驟吹  
欲以  
筆賺  
玉泉  
未可  
禱  
無  
數  
聞  
公  
疑

無適向  
欲  
天  
酸  
林  
不  
回  
曾  
長  
與  
我  
平  
來  
送  
風

已疑  
恣  
想  
意  
餘  
欲  
雪  
來  
觀  
水  
澗  
出  
師  
前  
對  
天  
懸  
彩  
代  
青

四  
靈  
南  
與  
謝  
林  
無  
謝  
山  
女  
寄  
阿  
華  
若  
禱  
空  
遠  
誰  
不  
聞

九靈山房集卷第二十六終

九靈山房集卷二十七

元戴良著

郡後學胡鳳丹月樵校梓

五言律詩

經金繩廢寺

寂寞唐朝寺  
頻年客到稀  
空山孤殿在  
荒逕一僧歸  
苔色驕秋雨  
松聲振夕暉  
驚鳥初有託  
近亦出林飛

鄧城逢故人

一別無消息  
誰知住此城  
忽逢難面認  
驟語各心驚  
身世丹衷折  
干戈白髮生  
憑君陳往事  
相看重含情

客中守歲

旅館生寒夜條風已轉晨絕憐天畔客虛負歲朝春綵  
勝承恩舊金錢問卜新妻兒千里外應亦念行人

挽章處士

處士家何在棲遲傍海壩園林行迹滅風物畫圖傳墓  
人採樵徑山餘洗藥泉聲名身後著猶賴子孫賢

客中憶寄以大千里二先生二首

道路離居久鄉關入望賒此生渾是客行處卽爲家關  
徑全栽菊分園半種瓜終知多失意身世一長嗟

攜家東海上三載滯還期髮爲多憂白身緣久病衰物  
華誰復對藥裹不曾離幽事關心極惟歌二妙詩

自述二首

事業此生休遑遑今白頭一年看又盡數口轉多憂醉  
憶山公騎寒悲季子裘妻兒重相見說著也堪羞  
家無十日程歸計苦難成爲客憂飢餒頻年仗友生剛  
腸隨世屈白髮向人明爭似湖居好扁舟載月行

歲暮感懷四首

驅馳三十載身世竟何如人老憂虞裏交疏病廢餘鄉



邦書未返湖海歲將除後夜燒燈坐依然歎索居  
移家東海上汨沒度危時草市腥江鮑民居雜島夷衣  
冠隨俗變姓字畏人知保己無深計翻言命可疑  
已被虛名誤偷生亦偶然兵戈十年久妻子幾家全往  
事溪雲外餘齡逝水前艱難有如此何日賦歸田  
自我離鄉井棲棲又十秋一身渾是累此世可無憂道  
路誰青眼風塵自白頭但求歸葬地餘事總休休

客居三首

豫作全身計遠投東海行地偏惟養拙歲久未知名苔

徑當湖闢柴門逐水成牧童時聚笑窮老一先生  
漂流何所往寂寞住湖陰道路無知己飢寒亂此心草  
枯春牧遠浪闊夜漁深敢憚艱虞事衰年自不禁  
寥落空山裏松門晝亦關江鄉千里隔天地一身閒聽  
雨多臨水看雲長傍山自今幽思熟無復歎時艱

辛亥除夕三首

眇眇家何在悠悠歲又闌十年東海上千里北風寒衰  
鬢隨年改愁懷借酒寬何鄉爲樂土身世各艱難

湖海風雲暗道途霜雪清如何一年盡翻使百愁生俗

薄乖留計時危緩去程家人團坐夜應悉旅中情  
移居湖水上已是一年期客路頻辭歲家山忘別時庭  
寒無鵲噪春近有梅知此夜傷情極椒觴懶獨持

哭楊大章先生二首

家紹文元學身安原憲貧世方推獨行天忽奪斯人客  
路誰傾蓋湖堤幾詠春回看攜手處不語自傷神  
近到揚雄宅徘徊至夕暉那知三宿別竟作九原歸許  
劍嗟何及懸牀事已非祇應重過日獨泣向空扉  
三日前嘗訪先生慈湖之上蒙留飲至日莫不聽去

酒口索子數藥方且言必親至而密授之故有許劍  
懸牀之語

訪止公於文溪

杖錫遊茲地過從動隔年已無離別想那有去來緣心  
事青山外禪機白石前偶來非道意敢借慧燈燃

七言律詩

秋興五首

野色蒼涼日自斜海城故故隱悲笳人間已退三庚暑  
天上誰乘八月槎俛首風塵秋有淚側身天地老無家



杖藜獨立清溪上  
愁對歸鴻沒暮霞

咸陽城下動秋風  
落木蕭蕭漢苑空  
太液曾聞駐遊輦  
上林誰見弋飛鴻  
王侯第宅蒼茫外  
錦繡山河感慨中  
關塞只今無夢到  
白頭吟望思何窮

唐朝宮殿面南山  
韋杜曾傳尺五天  
馮翊郡連通雨露  
嶠函地闢接風烟  
隴雲秦樹空今日  
衰草斜陽異昔年  
世事紛更共如此  
豈須見後始悽然

鳳凰飛舞下層巒  
珠樹瑤花一夜殘  
周室舊聞遷寶鼎  
漢宮今見泣銅盤  
荒祠猶記雙龍柱  
壞堦曾傳乙鳥壇

爲歎興亡腸易斷不須登眺傍高寒  
露下碧梧秋氣深天時人事共蕭森  
海流不盡衰年恨節序祇添故國心  
千里還家知幾日十年逃世至於今  
芳樽美酒無人共安得愁中滿意斟

偶書

自從北渡浣紗溪十載家山入望低  
失學已憐元亮子長齋應愧太常妻  
百年世事醯雞變一夜鄉心謝豹啼  
卻向歸途望遼鶴白頭和淚寫淒迷

憶鶴年有賦

投老江湖生事微，隱身草澤接交稀。  
情同栗里陶彭澤，形似遼東丁令威。  
紅日曉迷滄海樹，白雲秋老故山薇。  
牆東野客心同苦，幾度相從話夕暉。

寄沈隱君

故人家住白雲隈，占此崖盤與澗迴。  
風挾水聲歸逕竹，日將山影上階苔。  
律書在篋身同棄，瑞檢堆牀手自開。  
聞說蓬瀛從此達，好騎白鹿訪君來。

庸道旣別云自山北訪桂同德胡舜咨而還

何事扁舟此問津，似君標格邈難親。  
聞聲舊識尙書履

屏迹今我學士巾鳳口水深湖沒路龍頭山暝雨隨人  
遙知兩地登臨處念別各傷無限神

晚至永樂寺

江干細路走羊腸遠逐鐘聲到上方水竹暝時雲淡淡  
逕松深處月蒼蒼佛廬夜續傳燈火僧榻寒薰小篆香  
何用別尋天竺去人言此地卽慈航

題永樂寺水竹居

先師柳待制嘗訪匡長老於此

一上高樓恨有餘登臨事往竟成虛已無閣老履絢迹  
徒認匡公水竹居佩玉聲流池盡處琅玕影動月來初



從今便結東林社  
曉鉢高擎老衲如

同淬用剛登甘露寺

丹梯百尺護苔紋  
境有仙凡此處分  
殿影恍從天畔落  
磬聲渾向竹間聞  
山緣龍出饒青靄  
峰值雨微多白雲  
杖錫又登高閣去  
無端詩思忽紛紛

李帥家烹鶴見餉

千年端有化胎無  
一旦烹來野鳥如  
身死獨遺沙苑箭  
魂歸應詫漆樓書  
茅君入帳名空在  
衛國乘軒事已虛  
慚愧主人情意厚  
搜羅異味及巢居

星菊

李盤石家菊有同本異花一紫九黃者

白榆厯厯掩穹蒼誰種羣星近書堂太乙好隨孤豔紫  
天津錯認九葩黃根株灌溉元同品顏色參差忽異芳  
自是君家多瑞物作歌從此詫芝房

瑞蓮

李盤石家蓮有雙花並實者欲以是扁其堂  
求子爲記

是處秋風滿戶庭誰家猶有瑞蓮生雙開自昔聞連蒂  
並實於今喜共莖不學兩妃爭寵態惟含二女望君情  
李侯忠義天偏識好榜新堂爲勒銘

五言絕句

題瀟湘八景

洞庭秋月

皓氣澄素流，況當湖正秋。  
舟人夜半起，倚遍岳陽樓。

瀟湘夜雨

灑江思已悲，入夜聲轉急。  
還憶在荆南，卧聽湘妃泣。

山市晴嵐

巖上光已合，林端曙未分。  
暫出猶衣溼，況乃趁虛人。

漁村夕照

日落川光暝，一舟橫渡頭。  
心期逐漁網，蕩然俱未收。

平沙落鴈

聲傳孤渚迴影帶夕陽微爲有驚弦意欲下復遲疑

遠浦歸帆

楚客去鄉久還家未有期杳杳長江上誰遣一帆歸

烟寺晚鐘

冥冥景尙昏隱隱聲徐度山僧方遽起忽聽錯朝暮

江天暮雪

遠近忽同色安知江與山一棹在中流不敢過前灘

七言絕句



駱鄭二君子見訪賦絕句八首

賓王遺韻至今存自是儒流不易門  
詩卷若還題二妙齊名獨有廣文孫

客路誰爲骨肉親兩君邂逅結比鄰  
相交自可到頭白世亂還家有幾人

前時過我菊初栽此日望君花正開  
聞說欲來相問訊隔牆幾次候新醅

獨住江村客到稀忽聞山犬吠荆扉  
青苔黃葉無人掃買藥兒郎竟未歸

欲具盤飧餉故知村荒市遠只隨宜家人不解艱虞事  
猶想客來如舊時

兩袖龍鍾雙淚垂故園幾度入愁眉相過莫說未歸事  
一段傷情只自知

白首相逢能幾迴羨君仍作等閒來明年此日知何處  
且向空庭嗅落梅

憔悴江湖一病身心交盡日話情文只愁又向溪橋別  
後度行來重憶君

旅懷五首

百昔操觚逐縉紳也曾白眼看時人年來點檢平生事  
海角天涯一老身

春半家書預作期長兒十月送寒衣江空野曠無消息  
踏遍蒼苔又獨歸

家多子債幾時還世路悠悠歲又闌前月山妻書片紙  
爲言涕淚不曾乾

數口迢迢寄海邊鄉心客計兩茫然老妻豈悉未歸意  
將謂飄蓬似往年

獨向荒村歌竹枝寒烟暮雨不勝悲平生一種淒涼態

豈料偏歸老大時

題赤壁圖

千載英雄事已休，獨餘明月照江流。  
畫圖不盡當年恨，卻寫蘇家赤壁遊。

題張藻仲竹木

不見張生已六春，筆頭何事轉清新。  
鳳池染得龍池雨，寫寄寒林獨立人。

題四皓圖

欲向商山歌采芝，白雲望斷不勝悲。  
高人只在丹青裏，



滿鬢秋風共弈棋

題畫

憶向江湖歎暮秋  
冷鳧晴鴈共汀洲  
數株古木寒依水  
亦有啼鴉在上頭

五言長律

歲暮偶題二十二韻

削迹邊山邑  
投身傍海城  
驅馳悲世事  
出處愧家聲  
學術元求志  
文章豈爲名  
前途迷軌轍  
末路玷簪纓  
藩國羈疏穴  
衣冠備老成  
乾剛遭久紊  
坤軸值旋傾  
朋舊千

家淚妻孥兩地情風塵齊國往雨雪海邦行紀晉慚陶  
令依劉誤彌衡世偏欺逆旅天亦薄遺氓陋巷棲顏闔  
窮途哭步兵桐君方避姓越客豈通盟壯節雙寒鬢生  
涯一短檠道寧隨世屈身自向人輕孤矢乖前志干戈  
送此生何心歸故里浪迹寄遙程婦怨憐蘇子男婚憶  
子平攜家期浩蕩逐食歲崢嶸雲海望中白雪山愁畔  
清寒天催日短窮臘逼年更感激芳時謝淒涼老思驚  
客窗歌一曲涕泗下縱橫

詠雪三十二韻贈友

暮雲凝黯黹曉雪墮縱橫騁巧穿窗牖乘危集棟莖挾  
風潛作黨雜霰暗分聲綴柳如欺弱縈梅似妬清銀盤  
浮石出縞帶逐車成增勢初堆岳含光復灑瀛卽卑猶  
避污飄急未忘爭細度歌惟遠斜侵舞袖輕試深筇屢  
擲驗密手頻擎裹樹形披介摧篁韻嘯笙堞遙迷睥睨  
岸斷接坳泓罅隙仍仍掩高低故故平陵鋪看象鬪庭  
積羨猊猊浪走兒應喜狂號犬自驚林寒催雀聚簷白  
誤雞鳴照曜連金闕微茫混玉京烏輪埋欲沒鼈極壓  
將傾獻歲先期見豐祥此日呈及時銷癘疫潤物達萌

生列賀喧朝貴騰歡沸野厖第嫌災困約仍訝助驕盈  
冷豔凌迴騎寒光媚飲觥風流梁苑宴悽惻灞橋行亦  
有離鄉客遠居邊海城底穿嗟履屣路斷歎門閔孰動  
乘舟興誰憐臥寢情映書空舊習授簡豈前榮倚望勞  
晨策吟哦費夜檠枉煩歌玉樹寧許媿璇英刻畫移羣  
象搜羅憊五兵身孤慚待伴思沮詫羞明聊示輕微體  
殷勤比贈瓊

哭汪遜齋二十四韻

詩禮趨庭日風塵筮仕辰獻荆思報國捧檄冀榮親肇



典丹陽校旋蘇海邑民漁鹽千古舊絃誦一朝新浩蕩  
王綱解艱虞國步屯遂令娛綵士幾作負羈臣天地裨  
忠孝雲山獲隱淪陶潛猶紀晉黃綺肯歸秦體病相如  
渴家傷原憲貧將何具甘旨併窘奉昏晨善事行驚俗  
高居德照鄰儒言存道脈野趣任天真里巷稱耆艾鄉  
邦禮縉紳時方瞻故老世忽哭斯人莫駐桑榆景翻全  
寵辱身聲名應不泯傳播必殊倫循吏光前史文場殿  
後塵遺音悲賈鵬絕筆歎姬麟有客含情切長途灑淚  
頻知心遺鮑叔交誼失陳遵零落今如是襟懷孰可陳

未懸徐墓劍空憶漢江綸獨立西風裏老吟東海濱此  
生何所託歌罷復霑巾

歲除示姪十六韻

時將遊西浙

客裏光陰速天涯道路長漂流知幾處奔走已三霜似  
汝年猶壯如余老足傷應慚謝氏父徒憶阮家郎識曠  
惟遊衍時艱可薦揚第須依竹徑未用羨羅囊卜賣嚴  
公術醫鈔陸姓方暇仍研史冊閒亦愛詩章運至終超  
達道窮姑退藏晴窗開藥籠雨館倚書牀茗水支支綠  
淞雲片片黃客行隨處是旅食在身彊白首摧頽甚青

春奔迅將頻年同患難此去莫淒涼木德迎新節條風  
換歲陽萍蹤如可合處困更何鄉

哭揭祕監三十四韻

試續儒林傳之人迹已陳歸魂鍾阜夜復魄董溪春憶  
昔初觀國乘時蚤致身家聲漢司馬胄教古成均學術  
諸生識才華六館親南宮然燭夕北省聽鑿晨祕閣詩  
書舊容臺禮樂新討論拙邃典制作邁常倫信是閨中  
彥端爲席上珍春官方載筆東郭已埋輪鵬鶚期高奮  
驂騮且遠巡薇垣蓮幕客烏府繡衣人豈獨司喉舌猶

應領縉紳青冥來健翮滄海起脩鱗王氣幽州歇妖氛  
國步屯依劉西適洛戀闕北過秦賈傅俄悲鵬宣尼竟  
泣麟風塵辭組日江漢負羈臣殷士皆登用黃公獨隱  
淪黍離興歎切麥秀入歌頻牢落征途上飄零雨水濱  
時艱憐子孝歲儉感妻仁我羨陶元亮人誇賀季真如  
何遽凋謝況乃久遭迤已矣成長往哀哉付劫塵黔婁  
衾不足原憲數方貧筆冢名空在文場事已泯行囊猶  
簡牘旅冢但荆榛聽雨嘗連榻吟風更接茵玉山涵遠  
潤金井漱餘津白首論交地黃泉訣別辰分財悲鮑叔



投轄失陳遵北海誰求隱東都罷對賓向來知己淚霑  
灑滿衣巾

聯句

對菊聯句

翡翠翦秋葉金瓊鏤寒英良駢枝競戢戢植榦紛紛

翰逞芳固的礫鬪媚益晶熒璜幽姿匪人造逸態諒天

成轅傍芽萌庶孽乳萼孕懷綳溫螯虎縮逗翳痒蚝枯

搗莖良遲倩飈陣飈疾役雷輓翰翰拏楹互雜沓跂檻

遞紛爭璜秋榮恣姬媠春粲失嫫媠轅瑩奪鵝肪膩飛

攘鷗毳輕溫韻冽帖疏穴跡祕慰羈僮良魏書奉延輔

酈水滋甘馨翰締芳笑蘭友論雅傲梅兄璜撼撼感餘

鍛采采恰孤撐轅譜之已百品詠之復千名溫或繁若

朝弁或潔若藍瑛良或密若飄霰或燦若羅星翰或赴

若湊輻或屹若峩屏璜或散若瓊豆或聚若輜駟轅或

潤若璜佩或麗若金籛溫或鮮如鷺振或悴如魴頰良

或斥如僕隸或積如雲仍翰或翩如春蝶或熠如宵螢

璜或偃如簪偃或昂如氣盈轅或揚如袂舉或側如盃

傾溫或盛喜若笑或哀憂若醒良或卽階陞立或俱盆

盜升

翰

或儷處士逸或儷節婦貞

黃

或翔疑孔翥或峙

訝鸞停

轅

或詫天姥巧或覘地媪靈

溫

朝采有元亮夕

飡有屈平

良

用酬我嘉節來踐爾佳盟

翰

餽容交錯飭

卮許逡巡行

璜

摘鮮盛梨栗傾濁饒醪醅

轅

起酬足蹂

躡坐嚙腹膨脝

溫

陸味萃南品海腥極東京

良

已暢一

朝樂復哦千古情

溫

句奇媿犖确韻古鏗韶諷

良

馳驟

闖接武格鬪掀塵兵

翰

味辛薑桂忸語險魑魅驚

溫

敵迹屢屏懾敗眼頰瞠

良

籍湜走且躡郊島弛復獰

翰

尊卑異川岳清濁分渭涇

璜

遐思時蹠胃凝睇靡矚睛

轅  
顧慚驚駘力莫抗騏驥衡溫四美已云具三難亦既

并翰愁去踰激矢歡來劇抽絝璜卽此成放曠何用困

拘停良永緝婀娜佩庶濯塵垢纓翰

出遊聯句

杪秋劃澄霽遊思躍然動良林飈迅而清川氣漾不渝

翰宿期凌沆瀣晨集侵暘矇轅趨程指悠邈屏務遺空

德源興挾康樂高志激孟賁勇良筆牀黃帽賚茶竈蒼

頭捧翰放權闖鷁飛揚帆接鷁轅始循並縣山尋憩

橫江隴源午分魚石蹤暮合龍阜踵良谷烟披冪紗階



月踏流汞翰投院誇舊知開筵樂新奉轅宵嫌墜露繁

曙覺堆嵐重源塔訪湯師銘窆謁先公塚良綵巖何業

宓雨微何龍從翰崖寺跣蛇蜒江檻縈蟠蝮轅藍水碧

可通蜀山青忽擁良門羨登龍榮席矜烹鶴籠翰話離

憶沉淪語迹愧荒茸轅纓綏已駢集刀佩亦鞞琫源既

觀朱扉盛復瞰清泉涌良兩礪耳邊來雙峰眉際聳翰

虞宅址空存袁墓木已拱轅委蛇訝客閒叢脞笑僧冗

源金繩憩宿倦石林動新竦良大著孕璞玉賢孫耀珪

珙翰德邁東家邱義壓吾邦勇轅堅留馬就繫強別囚

脫季源竟忘漏艇危直遡夜潮沟良滿覆侷器欹顛蹶

同駕芝翰二賢首騰踔小子繼跳踊轅江濶水翻翻雲

黑天朦朦源甫濟膽固懾決去心益懣良孰書拯溺勳

誰息扶憊翰迹離魑魅驚身出蛟鼉恐轅叩門氣始

振卽館語猶恂源儒服漸林立賓墀竟川壅良爭看麟

一角共譽龜五總翰吐辭超鮑謝刮智駕晁董轅舫齋

窺曩楹蘭室睇今棋源困僮屏屢觸醉侶酒頻唾良屈

伸付蚨蠖聚散等蟻螻翰歸情蕩躍鱗別思眇抽蛹轅

筆耕期已駛詩債事尤耗源雲莊充昔贖雲林跛初躄

良唐生竟神駭沈子亦聽悚翰畫軸卷入檐書冊收貯

籠源磬折向蒼茫矢躍超濛瀕良仰視雲畔鳶去逐烟

中鷄翰到家跳夜厖入室響寒螿轅後會知何時余髮

已種種良

九靈山房集卷第二十七終